


成案質疑

賊盜十

卷十八九




			九二四八	漢書門
七五	五五	〇	八	
冊	架	函	號	類

內閣文庫				
九二四八	漢	書		
〇	八			
冊	架	函	號	類


內閣文庫	
番號	漢 9248
冊數	75 (31)
函號	296 100

三十一



夥盜殺人起意搶奪未曾傷人首犯照殺人為從擬流


雍正七年十月刑部會議覆東莞縣民聶亞三等盜劫田禾拒捕戕傷鍾亞與身死一案據署廣撫常 審擬斬徒具題查陳華峯家貧乏食知鍾允協田禾成熟起意盜割于雍正四年十月二十六日晚劫約聶亞三鍾亞三聶亞六李如芳彭紹謨同黨六人約定二十七日至陳華峯禾場會齊各執鎗刀扁挑鑷刀陳華峯聶亞三把截田至來路由北路前往鍾亞三等由南路行走一更時分路經田心墘地方適有卓亞二伏在樹林看守自己田禾窺見鍾亞三等料其為偷禾行徑遂奔報鍾允協允協喚同工人鍾亞與執械往巡至雙墳前坑尾適遇聶亞三陳華峯把截來路遙見鍾亞三等四人在田割禾鍾亞與執刀趕前喊拿聶亞三持槍攔阻鍾亞與舉刀向砍聶亞三用槍抵格適中鍾亞與咽喉倒地陳華峯並未助力見己傷人急



喚鍾亞三等四人將禾挑遁鍾允協跑回適遇鍾亞與之兄鍾亞福告知鍾亞與被傷情事遂同往看鍾亞與業已殞命鍾亞三等挑禾至陳華峯禾場各分散踪該縣據報驗明屍傷將鍾亞三等陸續拘獲歷審不諱查律內強割田禾依搶奪科之又定例內搶奪殺人者俱照竊盜拒捕殺人例擬斬立決等語應將殺人之聶亞三照例擬斬立決陳華峯雖未幫助殺死鍾亞與但造意糾黨執械截路強割田禾以致亞三拒捕槍殺鍾亞與身死陳華峯不應照搶奪爲首律擬徒應將陳華峯照搶奪傷人爲從減一等律食妻流三千里至配所杖一百折責四十板鍾亞三聶亞六李如芳彭紹謨在田割禾並不知拒捕傷人均依搶奪爲從減一等律徒二年半至配所杖九十折責三十五板刺字陳華峯所得匪穀應於各犯名下照追給至未旨依議

搶奪殺人爲從擬流

雍正十一年十一月刑部會議覆平和縣民黃斷等搶奪牛隻拒捕戳死涂定琦一案據福撫趙 疏稱黃斷原籍平和縣寓居鳳山縣緣黃斷窺見涂定琦在六分庄埔後牧有牛群起意搶奪於雍正十年三月二十八日邀熟識之劉暢張總吳來蔡坊整同往劉暢等允從上午時候分執竹尖擔竹棍扁挑火柴同行至半路張總黃斷又遇熟識之葉鳳林月邀其同往葉鳳應允同行林月辭以有事未去黃斷等奔至六分庄埔黃斷張總劉暢入埔吳來蔡坊整在外把風黃斷牽牛二隻而走當被事主涂定琦等知覺喊追黃斷恐被擒獲棄牛拒敵用竹尖擔戳傷涂定琦右血盆骨倒地劉暢用竹棍打傷涂定琦之兄涂定琛右脇張總用扁挑打傷涂定琦之侄涂伯煥唇吻各盜因聞埔內吹螺招衆隨卽奔逸時葉鳳在蔗園拔蔗解渴尚



未到埔間喊驚懼亦即奔回徐定琦傷重逾時殞命徐定琛徐伯煥
傷輕平復歷審供認不諱將黃斷照例擬斬立決但黃斷係已正法
臺匪吳福生等案內續獲之劉佑供明同夥為匪應於彼案審明從
重歸結劉暢等擬以流杖等因具題應如該撫所題黃斷合依白晝
搶奪殺人例擬斬立決但黃斷於臺匪劉佑供明同夥為匪於彼案
審明從重歸結劉暢張總合依搶奪傷人為從減一等律均各僉妻
流三千里至配所杖一百折責四十板黃斷等仍俱照例刺字該撫
既稱葉鳳林月照知人謀害他人不首告律杖一百遇熱審減一等
杖九十各折責三十五板照例先行發落等語無庸議黃斷之父黃
會該撫既稱應於謀匪案內究結應令於吳福生等謀匪案內審明
歸結黃斷所竊牛隻照追給主脫逃之吳來蔡坊整緝獲另結奉
旨依議

搶奪殺人為從擬軍

雍正十二年三月刑部會議覆南平縣民林爾珪等搶奪丁泰來銀
物致死崔招子一案據福撫趙 疏稱林爾珪籍隸南平縣於雍正
十年十一月二十一日偕柯廷仙吳周謨同往古田縣尋覓傭工有
吳宗耀亦往古田覓僱何係熟識途遇同行至深坑山邊坐歇言及
窮苦難度林爾珪起意商謀搶奪行客吳宗耀等聽從俱藏山林伺
搶適有丁泰來叔租乘轎回家併挑夫肩挑行李經過林爾珪令吳
宗耀等齊起下山喊搶丁泰來與轎夫邱君玉挑夫饒牙開喊驚懼
下轎棄担而走惟轎夫崔招子挺身出開將林爾珪打倒柯廷仙向
護用尖挑戳傷崔招子左肱吳周謨用柴枝打傷崔招子左腿崔
招子還毆吳周謨吳周謨又用柴枝打傷崔招子右肱肘惟時林爾
珪爬起用柴枝戳傷崔招子左膝以致崔招子跌落坑內是夜斃命

林爾珪等搶得衣被銀兩等物而散事主報縣陸續緝獲林爾珪等到案歷審不諱將林爾珪等擬以斬流等因具題除柯廷仙取供後解審在候官縣監內病故續據該撫題報吳宗耀于審題後在古田縣監病故均不議外查林爾珪首先起意搶奪復又最後下手戳傷崔招子左膝以致崔招子落坑斃命應如該撫所題林爾珪合依白晝搶殺人命擬斬立決再查定例內白晝搶奪殺人案內下手為從之犯照竊盜拒捕殺人為從例分發吉林烏喇等處給披甲人為奴等語今吳周謨係為從助力之犯不應照律擬流應照例僉妻解部刺字咨送戶部發鄂爾坤種地已獲之贓給主未獲之贓將各犯家產變賠查定例軍流罪犯監斃一人者管獄官罰俸三個月等語應將監斃軍犯一名之候官縣典史沈大榮罰俸三個月奉

旨林爾珪着即處斬餘依議

獍民搶牛殺人照紅苗例枷責

雍正十一年 月刑部會議覆宜山縣獍民覃扶作挾仇糾黨搶牛炮死覃扶的一案據廣撫金 將梁扶阿等擬以枷責等因具題除首犯覃扶作夥犯覃扶業均于取供後在監病故不議外該撫既稱下手打傷覃扶前之梁扶阿應烙紅苗聚眾搶奪人數不及五十名為從下手傷人例枷號三個月為從韋章架烙紅苗聚眾搶奪人數不及五十名為從例枷號四十日遇熱審均烙例減等發落等語應無庸議其脫逃梁仁清梁志龍覃扶歲韋道諾覃扶朝應令嚴緝獲日另結所搶牛隻向該犯名下照追給主再該撫疏稱覃扶作所執烏鎗長止尺餘並非例禁失察職名應免開報等語應免其查議可也奉

旨依議

克番糾衆疊次焚殺

乾隆五年六月刑部會議覆臺灣加志閣新港仔等社克番加巴打老日等糾夥疊次焚殺兵民一案據原任閩督郝 疏稱緣有中港庄民人陳天生係加志閣社番婦所生與該庄管事葉光裕狎好乾隆元年三月內有後壠社番丁老尉因足患瘋疾延醫盧朝選調治令妻奇劉前往光裕家取酒浸藥葉光裕以身係管庄圖飾顏面卽留奇劉在家飲酒比陳天生能通番語雜時亦在葉光裕家光裕令其陪飲嗣丁老尉候妻不歸往葉光裕家探視見其留飲與葉光裕吵鬧光裕聽盧朝選勸處出銀一兩五錢給丁老尉賠禮而寢是晚陳天生仍在葉光裕家歇宿葉光裕言及被番吵鬧以番刁惡欲謀充通事制壓該番令陳天生唆伊番親不服後壠通事張方楷管束乘機營謀陳天生記憶在心至五月內張方楷查知陳天生同番婦

飲酒情由希圖嚇詐聲言欲行稟官適有陳天生之母姨老尉往探
陳天生之母詢及地動情由陳天生答以年景不好番子定遭大兵
勦滅詭詞恐嚇令番衆上山意圖嫁禍張方楷至五月二十二日張
方楷因詐騙不遂果以陳天生姦淫番婦稟報經前任署淡防廳秦
士望差拘陳天生懼罪潛逃老尉家更加挾恨復以前言挑激續因
陳天生母舅末仔末思厘同茅老尉往竹塹圍砌木椿回至中港順
至陳天生家中適陳天生私歸留其午飯時茅老尉先行回社末仔
末思厘住宿陳天生家陳天生告以張方楷稟害復令其誘番逃走
上山不服張方楷官派當差自恃番親衆多勢必令伊招出可謀通
事末仔末思厘回社商之茅老尉轉告武葛猫六于適有新港社番
南茅僕僕往武葛猫六于圍寮聞知其事因南茅僕僕之弟武葛馬
本於雍正九年間夥同大甲西社番作反經張方楷責打致死含恨

已久頓起報仇之念即同末仔末思厘茅老尉武葛猫六于商議遂
潛往後壠杜欲戳死張方楷因張方楷先已下府隨議殺南海汶塘
兵使張方楷受累衆番九從南茅僕僕隨回新港社糾伊子加叻僕
僕并茅遠下勝務及烏麼抵抵搭藥烏麼合番色仔搭藥色仔茅色
仔老仔已色仔比茅老尉末仔末思厘武葛猫六于又招誘加志閣
社番加已打老日末仔末士甲交臘馬萬胆馬轄奇母交臘奇母什
班林武力等共十八人以打鹿爲名於六月二十九夜各執弓箭同
往南海汶焚燒塘房射死塘兵二人被傷二人冀欲移禍張方楷嗣
南茅僕僕等知事敗露不敢回社與末仔末思厘茅老尉商議復率
領焚殺南海汶各兇番內惟什班林武力未去其餘共十七人於七
月二十日同往猫裡社射死庄民十五人帶傷九人逃入生番山內
時加志閣社各番驚惶逃散旋經招撫陸續歸社而交臘馬萬什班

林武力老仔已勿臘等三番俱因乏食往合番社生番討地瓜交臘馬萬等聽生番迫脅引路同合番社生番合番打老日武葛斗近加已右武踏阿未大砲藥下勝務膽馬轄合番九歪並加已打老日於九月十六日潛到香山厝射殺庄民四人已歸各番復被煽惑重逃惟合番色仔搭藥色仔茅色仔老仔已色仔安心歸社不去又餘薩交臘馬萬武葛貓六千膽馬轄奇母交臘奇母加已打老日末仔末士甲烏麼抵抵茅老尉等被合番九歪復引到悠武乃社生番討食小米於九月二十二日早又同悠武乃社不知姓名生番與老仔已勿臘武葛斗近武葛毛毛馬馬毛毛買葛氏老尉末仔末姨劉等焚殺中港庄草屋十三間射死民人十一人燒死一人帶傷四人武葛毛毛交臘奇母中途先回時兵民救護殺死克番武葛斗近一名當經先後驗傷並淡防廳趙奇芳會同北路副將靳光瀚領兵剿捕先

後斬殺克番加已右武踏阿未等七名又加叻喊僕僕一名被生番殺死又茅遠下勝務畏罪在山自縊身死并遣土官通事及民人陳天生等陸續誘獲各克番到案除南茅僕僕末仔末思厘合番九歪加已右武踏阿未合番打老日大砲藥下勝務膽馬轄已經剿捕斬殺并茅遠下勝務縊死加叻喊僕僕被生番殺死武葛斗近被兵民殺死及爲首之茅老尉取供後在按察司監病故均不議外將同惡相濟之加已打老日末仔末士甲膽馬轄奇母援照雍正五年部覆臺灣水沙連克番疊行焚殺庄民之案依紅苗伏草殺人再犯不分首從斬梟例擬斬立決梟示武葛貓六千等分別流徒枷責援赦免罪并聲明陳天生應加等擬絞監候可否末減遇

赦不宥聽候部議等因具題查乾隆三年十二月內臣部議覆原任協理陝西道監察御史王柯條奏凡屬成案未經着爲定例者無得牽引

等因通行在案今克番加已打老日等糾夥疊殺兵民一案據該督撫照雍正五年臺灣水沙連克番疊行焚殺庄民之案援引定擬係屬成案並未着爲定例且所引紅苗伏草殺人再犯不分首從斬決梟示之例

欽頒律內又無此條更難援據臣等伏查例內紅苗聚至百人殺人者斬決梟示爲從者各枷號三個月等語此案克番糾夥雖僅二十餘人但疊次殺死兵民多人克惡已極應將加已打老日末仔末士甲膽馬轄奇母均比照紅苗聚至百人殺人例擬斬立決梟示跟隨同往並未殺人之武葛猫六干烏麼抵抵交臘馬萬交臘奇母搭藥烏麼什班林武力老仔已勿臘馬馬毛毛武葛毛毛買葛氏老尉末仔末姨劉均應照紅苗爲從不曾下手殺人例各枷號三個月仍照雍正十一年大學士張 條奏律例無可引用比照某律某例加減例奏

請

定奪教令陳天生唆番上山啓釁之葉光裕應照教誘人犯法律應流三千里至配所杖一百折責四十板詐騙陳天生不遂捏詞稟害致使唆番報復之張方楷應照妄稱主保小里長等項名色生事擾民者杖一百遷徒比流減半准徒二年律徒二年至配所杖一百折責四十板該督旣稱武葛猫六干烏麼抵抵交臘馬萬交臘奇母搭藥烏麼什班林武力老仔已勿臘馬馬毛毛武葛毛毛買葛氏老尉末仔末姨劉葉光裕張方楷均事犯在乾隆二年四月十六日

赦前應予援免張方楷仍革通事並葉光裕遞回各原籍安插合番色仔搭藥色仔茅色仔老仔已色仔雖跟往南海汊猫裡社庄二處均未殺人且久經歸社又曾經杖責効力贖罪應請免議丁老尉奇劉盧朝選訊係無干應予省釋各克番所燒營房已令修整民房草屋亦

經賑恤安頓不致失所悠武乃社生番係不知姓名野番無從跟緝
仍于張方楷名下將歷年所得芝蔴共三百三十六石折銀一百六
十八兩并丁老尉所得葉光裕酒錢折銀一兩五錢均照追入官充
器番箭標刀飭令銷燬等語應均如該督所議完結再該督疏稱陳
天生唆番逃走起釁應照蠻撞頭目犯法必跟究勾引之人查明確
實照誘人犯法律加等治罪遇

赦不宥例加一等擬絞監候但本條例文並無加入於死之文且曾經誘
獲歹番尚有微勞可否末減照例遇

赦不宥聽候部議等語查律載加罪止於杖一百流三千里不得加至於
死其勾引蠻撞頭目犯法本條又並無加入於死明文應將陳天生
照誘人犯法律僉妻流三千里至配所杖一百折責四十板仍照例
不准援免再該督疏稱失察勾引之地方官係前任彰化縣知縣秦

士望已經本案降調應無庸議至茅老尉在司監病故所有監斃職
名係按察司檢校兼攝司獄事今因別案革職薛士龍合就附參等
語查此案先經巡視臺灣御史白起圖題叅吏部會同兵部將兼管
之署淡水同知彰化縣知縣秦士望等照例議以降二級調用在案
此案應毋庸再議查定例斬絞人犯監斃一人者管獄官罰俸一個
月又定例已經革職官員如有前事故到部議處題明註冊倘事
後辯復還職如有應罰之罪仍於補任日罰俸等語應將監斃茅老
尉一名之管獄官按察司革職檢校兼攝司獄事薛士龍罰俸一月
仍註冊奉

旨加已打老日末仔末士甲膽轄奇毋俱着卽處斬梟示餘依議

因硝行搶致斃人命

雍正六年三月刑部會議覆候官縣民王亨等毆死張有遠一案據
 福撫常 疏稱緣王亨與黃良原充糧捕廳差役久經鞫退與吳人
 會調共任一鄉雍正五年正月十四日時值下雨王亨同吳人會調
 共坐陳古古店門前適張有遠在城買有魚肉果品并帶硝一小包
 欲為花炮祀神裝入义口途中被雨淋濕行至陳古古店前解看王
 亨見硝指為違禁告知吳人搜獲其硝借黃良家鐵鍊將張有遠拴
 住黃良繼至強拉張有遠進店張有遠不行吳人在後毆其腰眼一
 拳張有遠低頭拾石吳人復用拳毆其脊脅將張有遠擁入店內搜
 其身帶剩銀六分買酒併將所買魚肉煮食及陳古古來店勸解始
 將果品給回釋放張有遠傷重越六日殞命歷審不諱查取硝百觔
 以上問罪今張有遠買硝不上一觔並未違禁吳人等擅敢合黨毆

賊盜

五十九

白晝搶奪

搶平人致斃將王亨黃良會調俱依白晝搶奪傷人爲從律擬流具
題續據該撫咨稱會調於具題後發回收監病故訊無凌虐情弊出
具圖結報部等因除爲首應擬斬之吳人取供後在監病故應擬流
之會調於具題後病故均不議外應如該撫所題王亨黃良俱合依
白晝搶奪傷人爲從減一等律均刺字僉妻流三千里至配所杖一
百各折責四十板仍於各犯名下追賠魚肉酒銀一兩給付屍親收
領查定例斬絞重犯監斃一人者管獄官罰俸一個月又定例承問
官將正犯取有口供監斃一二人者免議等語應將監斃斬犯吳人
一名之管獄官候官縣典史洪嘉謨照例罰俸一個月承審監斃之
署候官縣事今補南平縣知縣梅廷謨照例免議奉

旨依議

起意行竊之犯依搶奪爲從治罪

乾隆三年九月刑部會議覆徐亞灶等截搶德慶州民何紹賢等猪
肉砍傷何紹賢身死一案據署廣撫王 疏稱緣有伍學中于乾隆
二年閏九月初一日至熟識之李元經家閒坐談及貧苦李元經素
知白馬寨畜有牛隻起意商謀糾黨行竊伍學中應允同出寨外路
口適遇徐亞灶李進文在彼閒談李元經找其入夥各亦允從約定
是晚在李元經家聚會各犯如期畢集同夥四人徒手起行直抵白
馬寨邊值何紹賢等在該寨買猪欲趕次日墟期發賣因而連夜宰
殺將肉挑回徐亞灶等見寨內火光有人宰猪不敢入竊回至三都
涇口地方徐亞灶起意截搶猪肉各犯聽從卽躲在山坡上等候徐
亞灶李元經各檢山上柴棍一條以爲撲火之具二更時分何紹賢
與何迥五黎逸寬何英九各挑猪肉一担次第行走何紹賢黎逸寬

各持火把照亮追至涇口陂下徐亞灶用棍向打何紹賢火把傷及何紹賢右眼胞何紹賢放下籬担徐亞灶向前搶肉何紹賢右手接住徐亞灶之棍左手持火把臂膊靠壓籬筐不容搶奪徐亞灶向取籬內屠刀砍傷何紹賢偏右何紹賢仆地徐亞灶即將火把踣滅維時李元經亦用棍打滅黎逸寬所持火把並未傷人黎逸寬與何迥五何英九棄担躲避各犯奪取猪肉奔回李元經家俵分而散何紹賢傷重延至是月二十四日身死屢審供認不諱查律註人少而無兇器為搶奪等語今徐亞灶等同夥四人並無兇器其砍傷事主刀係拾取事主籬內之刀並非攜帶之械應照搶奪科罪將徐亞灶等擬以斬徒等因具題應如該撫所題徐亞灶起意搶奪下手傷人致死合依搶奪殺人例擬斬立決李元經李進文伍學中聽從搶奪並未下手傷人均合照搶奪為從律各杖九十徒二年半至配所折責

三十五核仍刺字俟徒限滿日交與地方官嚴行管束該署撫疏稱李元經犯罪之後兩足拘攣已成廢疾應照例收贖已起之贖給主未起之贖於各犯名下照數追賠各犯並無另有窩線亦無同夥親屬知情分贓應無庸議等語均應如該署撫所議完結仍令該撫取李元經廢疾印甘結送部奉

旨徐亞灶着即處斬餘依議

搶犯割腹圖賴事三懼累服毒自斃

雍正九年十二月刑部議覆廣撫 題查范阿完起意搶奪于雍正八年十一月二十九日欲往前山仔地方截搶過客財物路遇范阿完邀與同往范阿完執扁挑齊至前山仔地方黃昏時候適巫阿已自惠來縣販魚而回經過其地范阿完即將扁挑向打中傷巫阿已顛門倒地范阿完等奪取魚脯挑回俵分而散巫阿已之兄巫元上因弟至晚未歸前往相接行至前山仔地方見巫阿已被傷卧地扶掖回家巫阿已備述被搶情由并告以內有一人像是范阿完之語巫元上即于十二月初一日往尋范阿完理論范阿完不認於初二日至巫元上家辯白巫阿已在旁指証范阿完即持巫阿已桌上菜刀割腹圖賴巫阿已恐致人命拖累採服毒草殞命歷審各認不諱范阿完除割腹圖賴逼死巫阿已輕罪不議外將范阿完等擬以斬

候等因具題應如該撫所題范阿完合依搶奪傷人為首律擬斬監候秋後處決范阿寬應照為從減一等律僉妻流三千里至配所杖一百折責四十板未獲贓物將各犯家產變賠奉旨范阿完依擬應斬着監候秋後處決餘依議



人雖多無兇器照搶奪定擬在洋一時行搶非預謀劫掠者比文
武官免議

雍正十年十月刑部議覆先據浙督李 疏稱江南華亭縣民顧五
顧三汪奉祥汪聖祥各欲出洋販魚顧五租谷船隻帶舵水孫顯
鬻潘老大沈慶官老胡定徐三倪三一共七人顧三自駕已船帶舵
水王品唐大楊老二曾香顧六一共六人又有潘中元搭船生理汪
聖祥租黃大之船帶舵水黃惠南陳二潘已宋三洪能葉榮徐大王
生一共九人汪奉祥租沈佩章之船帶舵水梁五陳慶貴倪榮施二
朱佩丁五何才一共八人先後由江南之滬缺出口汪聖祥船抵海
山洋面因少飯菜向竹箬上要買馬鮫魚因其不肯拆賣黃惠南攬
住竹箬葉榮潘已過箬搬魚二百斤陳二接遞回船不給價值開船
而去至晚汪聖祥遇伊胞兄汪奉祥顧五等四船俱因守風停泊適

有客船兩隻亦住泊在彼雍正五年五月二十二日早顧五因食米將盡向客船買米窺其載有蝦皮等物起意搶奪先向顧三商定又約會汪聖祥汪奉祥同去顧五顧三兩船在前與舵水孫鬚鬚王品等各將石子向客船拋擊顧五孫鬚鬚潘老大沈慶官老胡定徐二顧三唐大曾香朱佩丁五何才洪能葉榮徐大王生一齊過船搬搶王品楊老二梁五陳慶貴倪榮陳二潘已接遞汪奉祥黃惠南宋三在船把舵將蝦皮魚膠搬入已船汪聖祥船隻由吳淞滌缺進口將所搶魚貨賣銀二十四兩俵分其各船水手內惟顧六施二倪三及搭船之潘中元並未幫搶分財嗣據汪聖祥汪奉祥投首陸續獲訊各犯將顧五等按擬等因具題經臣部以律內人少而無兇器者方以搶奪定擬今顧五等同夥三十餘人分坐四船出洋行劫顯有預謀情形何得以販魚缺米為詞希圖輕卸該督將顧五黃惠南陳二

潘已擬遣顧三等九人擬徒未為九協應令該督再行研審妥擬等因題駁去後今據署撫王疏稱覆加研訊各犯供詞俱與原摺相符查顧五等初意寔係出洋販鮮汪聖祥一船因缺飯菜先搶馬鮫魚充食後又守風聚泊顧五因食米將盡向客船買米見有蝦皮等物一時起意糾同搶奪原非四船同行亦非預謀為匪人數雖多並無兇器寔與搶奪之律相符且因海洋搬搶非內地可比是以從重擬遣各犯應仍照原擬等因具題除夥犯曾香于取供後監故不議外應如所題造意之顧五及兩次隨同搶掠之黃惠南陳二潘已均應比照免死減等強盜例僉妻解部刺字顧五發吉林烏喇黃惠南發白都諾陳二潘已發寧古塔給披甲人為奴顧三王品唐大楊老二梁五陳慶貴倪榮宋三洪能均合依白晝搶奪為從律徒二年半至配所折責三十五板刺字該撫既稱並未幫搶之顧六施二及船

主谷韜黃大沈佩章等先經審明罪止杖枷照例先行發落保釋汪聖祥汪奉祥等毋庸再行質訊等語應均毋庸議在逃之葉榮孫鬚鬍潘老大沈慶官老胡定徐二倪三朱佩丁五何才徐大王生與搭船之潘中元緝獲另結各犯名下所得贓物並無事主呈報并所坐船四隻照例追變入官再該撫疏稱監斃應擬徒罪犯人曾香之官獄官係定海縣典史沈弘績相應附叅至此案前以浙省定邑洋面被劫將浙省疎防文武各官題叅而各犯船隻在江省漂缺吳淞等處出入亦經江省將疎防文武叅處在案今審明各犯出口原屬販魚一時在洋搶奪與預謀出洋行劫者有間所有原叅疎防各官聽候部議等語除前叅之江浙文武各官均應免議外應將監斃徒犯一名之定海縣典史沈弘績照例罰俸六個月奉

旨依議

四人持棍截奪不作人多有兇器

雍正十年九月刑部議覆湖撫王疏稱張全同盧三李三徐四同夥四人于雍正八年八月十一日同至均州中途憩息適有樊天錦騎馬經過李三見即起意商同截劫俱各允從隨至柳耗河無人之地各執木棍將樊天錦擒住按地截取銀錢被囊等物奔至山溝俵分而散至十三日張全路過思黃總被保正盤獲具報拏獲盧三又將張全等供行劫河南泌陽縣信陽州二案閱會審明定擬招解除盧三病故外將張全擬斬具題查律註人少而無兇器搶奪人多而有兇器強劫等語今張全等四人搶奪樊天錦銀錢並無執持兇器該撫將張全依強盜已行得財律擬以斬決於此案正法與例不符但張全同丁尚等行劫河南泌陽縣吉秉純信陽州李忠志二案同夥九人均係執持鳥鎗等械行劫法所難宥其吉秉純之案雖經河

督田 題結而李忠志一案尚未具題應令該撫將張全閉會河南於李忠志案內從重歸結奉

旨依議

生員控嫌統眾奪牛

雍正元年十二月刑部議覆革貢鍾呂禔衿潘澤生統眾搶奪唐奇萬等耕牛一案據廣撫孔 疏稱鍾呂潘澤生于康熙六十一年二月初四日由唐奇萬等家村庄經過強索酒飯不遂鍾呂等辱罵而歸初六日鍾呂等率領族人鍾塗等二十四人復往唐奇萬家尋毆唐奇萬等見勢兇惡各自躲避鍾呂潘澤生忿無可洩即使鍾塗等將唐奇萬等八家欄內之牛共十九隻搶去經唐奇萬等央聶雲富等屢求不還遇牛廬倒斃七隻鍾呂潘澤生將牛肉剥賣其餘牛十二隻盡行出賣唐奇萬等控縣拘鍾呂潘澤生鍾塗到案歷審不諱將鍾呂等擬戍具題查鍾呂潘澤生身係貢衿因顧法紀平素下鄉慣行勒索酒食今因唐奇萬等不能供給遂致辱罵又率眾往唐奇萬家將耕牛搶奪擾害良民殊屬兇惡不便援

赦應將鍾呂潘澤生比照兇徒因事忿爭聚眾圍繞房屋搶檢家財除正
犯死罪外徒罪以上不分首從充軍律各僉妻發邊衛永遠充軍至
配所杖一百折責四十板所奪耕牛照追給主該撫既稱鍾鑿係聽
從鍾呂潘澤生糾約同行應准其援

赦免罪未獲之鍾鼎九鍾章卿鍾秀美鍾立梅鍾起斗鍾聲全鍾方鍾聲
滿鍾聲圓鍾應朝鍾立任鍾祥卿鍾鐸鍾美鍾永昌潘述宗潘配孔
潘潛潘孔潘玉宗潘統潘宗顯均應援

赦免其緝拏奉

旨依議

搶奪客船不以原造意之人爲首而以後起意之犯爲首

乾隆三年十二月刑部會議覆福清縣民余景等在桃仁嶼洋面搶
奪陳廷楚船內銀豆服物一案據調任福撫盧 疏稱緣余景與姚
五四于乾隆元年六月內向船戶楊德姐即陳武私租渡船一隻領
給福清縣海字一百十號牌照內配舵水楊官使楊開森楊添陳天
治四名余景等遂令林進孫頂舵工楊官使之名陳奇奇頂水手楊
開森之名姚五四頂水手楊添之名余景自頂水手陳天治之名在
小日江口往來濟渡七月初九日余景等因無人搭載言及貧難度
日即起意與李尊姚五四林進孫陳奇奇商謀出洋搶奪各皆允從
李尊又轉邀劉中吳尊一共七人于初十日早在小日出口欲往洋
中島嶼等候有船停泊即行搶奪上午時分行至桃仁嶼洋面適遇
陳廷楚船隻在上風駛下壓壞余景等船撇李尊將船攏去索賠陳

廷楚不允余景先跳陳廷楚船上李尊姚五四林進孫劉申吳尊等
接踵而過羣相爭鬧陳廷楚堅不應允劉申吳尊各執陳廷楚船上
竹篙欲行混打陳廷楚與船上水手各避入後艙李尊起意搶豆賠
船喝令余景等搬取船上黃豆一十一担五十斤李尊又見箱籠二
隻蓑衣二件隨手丟擲過船李尊又慮陳廷楚之船追趕復取陳廷
楚船上菜刀割斷篷線而回時陳奇奇在已船執舵卽行駕走各將
箱籠開看內存銀五兩併緞布鞋衣服等物是晚仍由小日人口十
一日駛至興化酒蘭地方將黃豆賣與有販不知姓名人共得錢六
千四百七十文并將銀五兩換錢四千文除扣給余景姚五四修船
錢一千三百七十文外餘與衣物七股俵分而散余景等卽將船艤
一併修整仍行濟渡船主陳武因中元節自小日回江口祭祖二十
日搭入本船仍回小日經壁頭汎并兵見船塗白可疑盤查搜獲服

物將人船牽回并獲李尊等押解到案屢審不諱查律開人多有兇
器者爲強劫人少無兇器者爲搶奪此案同夥雖有七人並無兇器
與搶奪之律相符余景起意出洋俟搶停泊之船尙未到停泊之處
而行船適遭壓壞索賠不遂臨時起意搶奪陳廷楚豆物實係李尊
分別按擬等因具題應如該撫所題除爲首起意之李尊于取供後
病故不議外余景姚五四林進孫劉申吳尊陳奇奇均合依搶奪爲
從減一等律各杖九十徒二年半以搶報強之陳廷楚應照不應重
律杖八十但余景等俱事犯在乾隆二年四月十六日

赦前均應援免并免刺字已起之贓給主未起之贓着落各犯家產變賠
該撫旣稱船主陳武訊不知情其小船一隻租與余景並未報明澳
甲出結報官係在乾隆二年八月定例以前應請免議所有船隻并
免入官再各犯從前並無犯案均無同居親屬知情分贓亦無窩家

李尊係應擬徒之犯于取供後在外取保病故均無庸議等語均毋庸議再該撫疏稱濫給船戶楊德姐卽陳武牌照職名係福清縣知縣莊年但給照之時係在雍正十三年九月初三日

赦前併請援免所有失察小日出口岸各職名文職捕官係福清縣分理平潭縣丞費璜印官係福清縣知縣莊年武職係海壇鎮標右營左哨頭司把總陳吳燦等語除該撫既稱濫給船戶牌照之福清縣知縣莊年係在

赦前并請邀免等語應毋庸議外查定例奸船出入海口遇有失事將守口官罰俸一年等語應將

赦後失察小日出入口岸之福清縣分理平潭縣丞費璜福清縣知縣莊年照例罰俸一年定例內盜由海口以內奪坐船隻偷越出洋遇有失事發覺將失察守口武職各官降一級留任限一年緝拏全獲開

復若本案已無逸盜二年内有能拏獲別汛奸船以及本汛並無失事具題開復盜從外洋行劫之後散黨登岸混冒人口守口官失于覺察者罰俸一年等語今余景等在洋搶奪陳廷楚銀豆服物一案在于乾隆元年七月初十日出生入口岸至失察武職係海壇鎮標右營把總陳吳燦例應降一級留任再罰俸一年今本案同夥七人俱已全獲已無逸盜應定以三年内獲別汛奸船本汛並無失事方准開復奉

旨依議

因捉姦不獲乘機攫取財物比例擄軍

乾隆五年十一月刑部會議覆番禺縣陳禮君等向區叶侯家捉姦不獲乘機攫取財物一案先據署廣撫王 審擬將陳禮君會悅升周殿章陳聖發王朝勳楊亞三依搶奪律擬徒季超賢柳沛長郭郁方楊亞四王彩鰲王易篆擬杖地保聞偉佐柳友文從中說合之周秉谷擬杖王永萬黃氏擬以枷責分別收贖等因具題經臣部查此案陳禮君不過窺見區叶侯之妾黃氏與王永萬戲謔並無通姦確據卽欲往捉姦必偵知王永萬果入黃氏家內始行密率豈有事屬疑似以不應捉姦之人遽議捉姦之理且姦夫止一王永萬何必糾集十二人夤夜持械撬門入室分佈把風入室之時又何故不先行究問姦夫下落遽將黃氏綑縛朦掩口面并銀錢衣物搜劫一空顯係共謀行劫應令該署撫再加詳審按律妥擬具題到日再議等因

題駁去後今據該署撫疏稱陳禮君雖未親見王永萬與黃氏通姦但黃氏手拍王永萬之肩出自目擊若非已成姦好豈有男女如此褻狎之理王永萬知黃氏之夫外出兩次潛至門首探望其急圖續舊情形畢現陳禮君料其是晚必往約人往捉在衆人多屬年少輕狂一聞捉姦卽皆踴躍并不待陳禮君逐一相邀所執槍篙均係駕艇尋禾之具而季超賢在外把守原防姦夫逸出並非分佈把風至于入室不先究問姦夫下落蓋因黃氏當門攔阻先示以藏匿姦夫情形復因黃氏欲喊故有縛手掩口之舉但遍尋王永萬不獲偶見財物攫取而出事出一時毫無預謀行劫情事詳審各供捉姦不獲攫取財物委無疑義均應仍照原擬將陳禮君等擬徒季超賢等擬杖王永萬黃氏擬以枷責等因具題查律載搶奪人財物者杖一百徒三年爲從減一等又定例搶奪傷人案內傷輕平復爲首者發邊

衛充軍爲從杖一百徒三年再大學士張 條奏嗣後律例無可引用援引別條比附者于案內聲明恭候

諭旨遵行各等語此案陳禮君糾衆捉姦持槍入室細縛黃氏兩手搜取衣服銀錢若僅依搶奪擬徒殊屬過輕應比照槍奪傷人案內傷輕平復爲首例僉妻發邊衛充軍曾悅升周殿章均應改照爲從應徒三年陳聖發王朝勳楊亞三均合依槍奪爲從杖九十徒二年半俱刺字仍將陳禮君比照罪名之處照例聲明恭候

欽定再該署撫旣稱季超賢柳沛長郭郁芳王彩鰲黃易篆楊亞四並未分贓均合依事後知情不首告律杖一百王永萬黃氏均合依軍民相姦例枷號一個月各折責四十板黃氏杖罪的決枷罪照例收贖保鄰聞偉佐柳友文周秉容均合依不應重律前次審明分別發落區叶侯審無縱姦情事無庸議等語均應如該署撫所議完結臣等

更有請者查此案該署撫審明黃氏通姦有據陳禮君捉姦非虛寔係乘機搶奪自應照搶奪律問擬但粵東濱海素稱多盜恐刁悍之輩夥衆行劫拏獲之日欲避重就輕故借捉姦搶奪爲詞而承審官員遽照捉姦搶奪問擬以免處分亦未可定請

勅下該署撫嚴飭各屬應將捉姦與不應捉姦律例通行曉諭若非應捕之人毋許混行捕捉以維風化以靖盜源再該署撫疏稱本案原察疎防各官應請免議等語應無庸議奉

旨依議

兄嫁妹氏旋即搶回因無圖財之心照搶奪定擬

乾隆八年閏四月刑部議覆廣撫王 咨稱茂名縣民古接翰嫁妹古氏與貢生吳若益爲妾後因悔婚不遂糾黨搶回乘機攫取財物一案緣古接翰之父古慶第前妻生子古接翰女古氏後妻李氏生子古亞揆古慶第身故李氏携子轉嫁袁雍爲妾古氏年長未嫁適乾隆五年十二月十七日吳川縣貢生吳若益至府買物寓于鄭裕齊家意欲娶妾回家事母鄰人關有信知古氏肯與人爲妾往來說合二十二日關有信與古接翰同至鄭裕齊家與吳若益議定聘銀一十六兩另備服飾酒禮寫立合約是日吳若益即憑鄭裕齊等送交聘銀一十四兩存銀二兩謝媒約二十五日迎娶古接翰回家二十三日遣人前往袁雍家接回李氏母子送嫁吳若益復憑鄭裕齊等備送酒禮服飾二十四日袁雍至古接翰家中詢知吳若益年老

髮白斥責古接翰不應貪得財禮以少妹嫁與老翁爲妾致誤終身古接翰頓萌悔心遂圖退還聘禮二十五日早吳若益令媒先往告知是日娶古氏下船卽欲開行古接翰當借繼母撫養名色索取吳若益乳抱銀四兩竊擬吳若益不允便可借端退婚詎吳若益卽送銀三兩二錢并發轎到門迎娶古接翰于倉猝之間計無所出不得已將皮箱二隻裝盛嫁奩遣弟古亞揆伴送古氏下船弟妹去後忽圖搶歸先囑繼母到船親送古氏誑稱有衣現縫未完留待次早開行卽糾約營兵邱延珍張君興捏稱吳若益原聘妹爲子妾及娶至船中吳若益欲自爲妾妹現欲尋死免邱延珍等幫同搶救并許各謝銀一兩邱延珍等信以爲實各皆允從張君興并令工人何賢舉同往是晚古接翰同李氏及張君興與何賢舉先後至邱延珍家會齊古接翰手持燈籠餘皆徒手一更時分同至西門河邊古接翰喚令伊弟古亞揆舢船近岸李氏在岸等候何賢舉在岸巡欄古接翰邱延珍張君興同下船內古接翰搶出古氏李氏扶掖上岸吳若益叫喊邱延珍用手叉其頸脖古接翰復令邱延珍張君興古亞揆搶取皮箱二隻竹箱一隻登岸同回古接翰家中古接翰開視竹箱有銀二錠重一十九兩八錢緞二疋遂分給邱延珍張君興各緞一疋何賢舉銀一兩餘銀入己其皮箱內所載衣服首飾仍交古氏收藏而散事主吳若益前赴茂名縣具控前縣王之正因時值封印未究嗣經喚集原被犯証審係袁雍主謀搶奪袁雍倚恃貢生與營兵邱延珍等俱未到案吳若益赴府呈控審訊各供袁雍與古氏有姦欲圖爲妾主謀賄買營兵邱延珍等糾衆搶奪詰訊袁雍堅不承認難以定案業經查開袁雍入學年分捐貢事例咨革在案逐加研鞫據古接翰供認寔因袁雍斥責嫁妹之非欲圖悔婚不遂復糾同邱延


珍等搶回不諱前供袁雍欲圖為妾主謀糾搶實係畏刑圖卸訊之
邱延珍等亦供認聽從古接翰糾搶得贓情實嚴訊袁雍堅供原與
古氏有姦並無欲圖為妾主謀糾搶情事查例載將姊妹嫁賣與人
作妻妾騙財之後中途聚眾行兇邀搶人財屬有司者發邊外為民
等語此指先有圖財之心始將姊妹嫁賣者而言今古接翰嫁妹之
時原無心誑騙後因袁雍斥責始圖退婚退婚不遂復圖搶歸順取
贈嫁之物并及吳若益之箱似與發遣之例未符古接翰除誣供袁
雍主謀糾搶係誣輕為重輕罪不議外合依搶奪為首律杖一百徒
三年至配所折責四十板邱延珍張君興何賢舉李氏古亞揆均照
搶奪為從減一等律杖九十徒二年半至配所各折責三十五板俱
刺字俟徒限滿日遞回原籍安插嚴加約束不許出境李氏係婦人
杖罪納贖徒罪照律收贖古亞揆年未及歲照律收贖均免刺袁雍

姦妾前夫之女應同凡論古氏除聽從伊兄指使扶同捏供袁雍主
謀糾搶係誣輕為重輕罪不議外應與袁雍均合依軍民相姦例各
枷號一個月滿日杖一百折責四十板古氏係婦人杖罪的決枷罪
收贖吳若益據訊不願娶古氏為妾應離異仍交古亞揆領回聽其
擇配所有吳若益送過聘金服飾應同被搶之緞疋銀兩一并照數
追完已起衣服六件經給吳若益收領未起之聘金服飾及緞疋銀
兩并燒燬之竹箱計值銀一錢二分均于各犯名下照追給領合約
二紙據供燒燬無憑起追何賢舉收受古接翰銀一兩照追入官所
當衣服當戶並不知情應免提訊于古接翰名下追還當本給領無
干之鄭裕齊聞有信先行摘釋兵丁邱延珍張君興據供先於乾隆
五年十二月二十三日因不守營規玩法滋事開除名糧但是否革
糧在先行搶在後俟移營查覆到日另文詳咨袁雍貢照業據該縣

追繳送銷并聲明前任茂明縣續調陽江縣別案革職知縣王之正
拘犯審訊未經通詳亦屬不合今已別案革職應毋庸議除咨吏部
戶部禮部外擬合咨達等因前來據此古接翰等均應如該撫所議
完結其邱延珍張君興是否革糧在先行搶在後應令該撫作速查
明定議報部至前任茂名縣知縣王之正拘犯審訊未經通詳應否
免議事隸吏部該撫既經咨明應聽吏部查議可也合咨前去查照
施行

誘人搭船哄賭脅騙銀錢

雍正五年十月刑部會議覆頁子船匪犯李子燦等誘攬徽州黟縣
民汪生夥賭脅騙銀錢一案據安撫魏 疏稱李子燦起意糾約曾
三鄔三董三僱葛子猷船隻于雍正三年正月初六日自江寧上河
開行令葛子猷沿江攬客設騙至二月二十日船泊安慶小南門外
十五日有徽民汪生搭船前往黃盆葛子猷見其子身携有行李箱
篋招攬入船董三假扮差官李子燦鄔三假作搭船客伴隨即開行
斯時曾在陳二家不曾下船駕船行至江中李子燦與鄔三抹牌
誘哄汪生同賭汪生悞墮術中抹牌李子燦又局騙買汪生賭輸
李子燦等搶汪生錢四百文復脇汪生要銀因其勿允輒強開箱篋
搶取銀三十兩并另外家信十二封汪生情急叫喊李子燦等聲言
恐嚇綑縛汪生沉于江中董二假為勸解止還其家信行李箱物并



錢一百六十文送汪生于柳州岸上各匪仍還棹安慶張家港曾三亦至舟中俵分銀兩而散嗣獲鄔三等到案歷審不諱將李子燦等擬戍等因具題除船戶葛子猷已于取供後在監病故不議外李子燦應比照無籍之徒誘引生事綁縛平民脅騙財物律枷號一個月僉妻發烟瘴地方充軍至配所杖一百折責四十板鄔三曾三亦應照律充軍但該撫疏稱鄔三曾三于和州針魚嘴地方謀死徐文遠案內有名曾三又于江寧縣誘騙王公遠戴自謙案內有名此三案內未經審結應俟彼三案審明從重歸結各犯所得銀錢照追給還原主在逃之董三緝獲另結匪船一隻該撫既稱現經江寧縣封貯應令該撫轉咨蘇撫作速變價入官再該撫疏稱監斃葛子猷之官獄官係署東流縣典史事吉陽司巡檢高炳查高炳委催漕船赴淮葛子猷病故之日高炳因公出境止係監斃一名例得邀免等語查定例軍流罪犯監斃一人者官獄官罰俸三個月等語並無因公出境并監斃一人免議之條應將監斃軍犯葛子猷之署東流縣典史事吉陽司巡檢高炳照例于現任內罰俸三個月至李子燦等往來江上夥同誘賭脅騙財物地方各官漫無覺察例有處分應令該撫作速查明題參奉

旨依議

船戶攬客誘賭搜搶銀兩

雍正七年十一月刑部議覆署蕪撫彭 疏稱臨川縣民朱國慶與
 鄔三糾約鄧吉龍曾三鄭川羽彭有章朱士璜許世九燕尚志老官
 周老四鄭爾宏共十二人僱坐何老二張老二船二隻于雍正三年
 八月初三日停泊南門河下鄭川羽攬搭王遠公上船開至大勝關
 僻處朱國慶彭有章誘王遠公賭博未遂朱國慶卽將遠公行囊內
 銀八十七兩搜出王遠公爭奪被朱國慶拳毆左乳鄧吉龍推送遠
 公登岸鄔三等將銀兩俵分而散嗣經拏獲朱國慶等歷審不諱將
 朱國慶等擬以斬軍杖罪等因具題除鄔三已于徐文遠案內正法
 曾三鄭川羽彭有章船戶何老二已于徐文遠案內病故朱士璜許
 世九于取供後在監病故不議外朱國慶鄧吉龍又于戴自謙一案
 有名已經審題朱國慶于彼案擬軍應于此案從重歸結鄧吉龍兩

案罪無輕重應于本案發遣朱國慶合依搶奪傷人爲首律擬斬監候刺字鄧吉龍合依無籍之徒引誘生事騷騙財物例枷號一個月滿日僉妻發烟瘴地面充軍至配所責四十板窩留鄔三之陳鬍子應照知情窩留盜犯例徒三年至配所責四十板侯二台依恐嚇得財計贓准竊盜論一兩以下加一等律杖七十免刺已經發落無庸議已獲贓物給主未獲贓物照例追賠侯二名下所得銀錢照追入官周老四鄭爾宏老官燕尚志張老二嚴緝獲日另結奉

旨依議

商船在海遭風覆溺官兵私撈銀兩入已

雍正十年二月刑部議覆廣海寨叅革守備鄧成撈匿陳貴等在洋覆溺商船飄流銀錢一案據廣東巡撫鄂疏稱緣福建龍溪縣船戶徐瑛托弟徐榜併夥計陳貴管駕洋船往噶喇吧貿易回帆于雍正六年八月初六日在洋遭風徐榜陳貴恐船覆溺將銀兩約共十包纏于桅上須臾船碎徐榜及船上人貨俱被淹沒止存陳貴等一十三人騎桅隨浪飄至黃茅灘初七日登岸至鄉村覓食于初八日見有官兵船隻稟懇撈取所纏桅上銀兩詎守備鄧成以船船頂風難行堅執不允陳貴等無奈遂往省城催人往撈至十一日風息鄧成換坐漿船前至黃茅灘查看見有桅篷卽令兵丁撈摸適有漁船駢集俱入水撈取兵丁撈獲銀共二千五百二十八兩漁船戶張瑞權等撈獲銀共一千五百九十兩各漁戶將銀七十兩交鄧成貯作

修廟之用餘銀鄧成聽船戶收回分貯取有漁戶姓名單備查其兵丁所撈銀兩乃鄧成收貯隱匿不報迨前任廣州左翼總兵官謝希賢查追鄧成及船戶始將銀兩繳出貯庫奉文行司提審鄧成又復賄囑藩司書辦羅永昌捏稱在洋巡拿及船張弘盛等口供一節以圖掩飾歷審供認不諱查定例內開商船失風被淹商民俱已救援得生因而撈取財物者兵丁照搶奪本律杖一百徒三年計贓重者從重定議如淹死人命在先弁兵見有飄失無主船貨撈搶入已不報照得遺失官物坐贓論等語今查陳貴等商船遭風雖淹死人命在先而陳貴等已稟知鄧成懇求撈取乃鄧成堅執推辭越日往查令兵撈取明知有主之銀希圖隱瞞入已與撈取無主船貨不同鄧成除賄囑添供輕罪不議外應照搶奪贓重者加竊盜罪二等罪止杖一百流三千里律擬流漁船戶張瑞權溫繼昇譚喜生湯國重吳杖一百流三千里律擬流漁船戶張瑞權溫繼昇譚喜生湯國重吳

廷機譚上鳳均照搶奪為從減一等律杖徒刺字槩船目兵麥興瑞狗匿不報照不應重律擬杖革糧羅永昌受賄改供應計贓一十兩杖九十無祿人減一等律擬杖革役等因具題應如該撫所題鄧成應照搶奪贓重者加凡盜罪二等罪止杖一百流三千里律僉妻流三千里至配所杖一百折責四十板漁船戶張瑞權溫繼昇譚喜生湯國重吳廷機譚上鳳均應照搶奪為從減一等律徒三年至配所杖一百各折責四十板俟徒限滿日回籍交與該地方官嚴行管束不許出境該撫既稱狗匿不報之槩船目兵麥興瑞應照不應重律杖八十革糧受賄改供之羅永昌應計贓一十兩杖九十無祿人減一等律應杖八十革役已經折責發落等語均毋庸議該撫又稱鄧成及船戶撈獲銀錢先經追出給徐瑛之子徐應芬與陳貴收領給照回籍等語應毋庸議羅永昌所得贓銀四兩應于該犯名下照追

其未得聽許銀八兩應于鄧成名下照追一併入官奉

旨依議

糖船遭風搬貨奸民乘危多索酬謝并營弁擅責民人

乾隆三年正月刑部咨覆據廣督鄂 咨稱原任碣石鎮左營右哨頭司亦革把總蔡承擅責民人一案緣惠來縣船戶許源泉裝載商民方紹端等白糖往江南生理於乾隆元年七月十三日出口十四日遇風颶至陸豐縣地方是時風浪湧大船勢將覆許源泉等喊救適有鄉民蔡萃寬聞聲赴救許源泉等即令覓人搬貨許有酬謝蔡萃寬言定二八分謝船戶許源泉商民黃興宗情急許允蔡萃寬即喚覓脚夫共三十餘人搬起糖一百八十四包并管箱行李等物其餘糖貨未及搬完被風擊碎搬運各人向索原許二八分謝之糖許源泉等以現存貨物無多意欲售賣糖包用銀酬謝衆人不允遂致爭論蔡萃寬以船戶客人翻悔不給聲言照議二八分取於是衆人各按搬運糖包數目分取而散維時陳亞相林亞妙馮士開范世爵

黃亞長五人因船戶許源泉等復浼搬移行李兼許另酬伊等復搬行李事畢除照衆各將前搬糖包按二八之數挑回二小包去後復來討取搬移行李酬儀陳亞相卽挑糖二小包啓行而林亞妙等四人正在抬糖適遇碣石鎮標水師把總陳才聞報赴救見林亞妙等疑爲搶貨令兵拿獲並追獲陳亞相并糖二小包將糖卽交船戶收領隨有陸汎把總蔡承亦聞報而至陳才隨將所獲陳亞相等五人交與蔡承囑令送縣蔡承將陳亞相等各責十棍釋放嗣把總陳才將獲犯情由報營而許源泉方紹端因糖包被搬不甘各捏以搶貨拆船等情具控營縣及查開把總蔡承擅將獲犯責釋情由揭報奉咨斥革行司飭審茲據該署縣研訊各犯實無拆船搶貨等事但脚夫搬運客貨原應計工受值乃因許源泉遭風事急遂多索酬謝雖經許源泉等許允究非心肯蔡萃寬等比照凡買賣諸物兩不和同

而把持行市專取其利者杖八十已得利物計贓重者准竊盜論免刑律并贓科罪查該犯各所取糖包折筭共三十四大包值銀六十八兩竊盜贓六十兩以上杖七十徒一年半蔡萃寬起意索要二八分取以爲首論杖七十徒一年半蔡崇盛巫義山許元祥李亞得賴智賢黃義英黃爾板鍾殿貴徐士江鄒順祿余世聘羅元標陳位生陳亞相林亞妙黃亞長范世爵馮土開係爲從應各減一等杖六十徒一年俱免刺船戶許源泉除捏稱水手許福利頭顱被傷輕罪不議外其與商民方紹端証控蔡萃寬等拆船搶貨應同方紹端均合依誣輕爲重律及坐計其剩罪各杖六十照例收贖銀四分五厘但各犯事在

赦前均應援免并免收贖把總蔡承審無賄縱情弊應請照例准其開復等因咨達前來據此應如該督所擬蔡萃寬等准其援免完結許源

泉等仍免收贖其各犯所取糖包向各犯名下照追給主至該督咨稱不識姓名各犯分去糖包行令照案緝拏獲日另行追給至斥革把總蔡承該督雖稱審無受賄情弊等語但擅行責釋民人應照不應重律杖八十其應否准其開復之處事隸兵部該督既經咨明兵部應聽兵部查議仍知照兵部並該督可也合咨前去查照施行

搶親錯搶媳妹受辱自刎比照強奪良家妻女爲妻妾問擬

雍正六年十二月刑部會議覆河督田 題陳子臣主使何大忠等強搶王文秀之女王二女致王二女自刎身死一案緣王文秀生有二女大女憑何大忠爲媒許與陳子臣之子小雨爲妻雍正五年六月內王文秀欲別尋種地陳子臣恐其携女遠逝卽主使何大忠率領伊妻熊氏又糾約何大騾子等齊赴王文秀門首熊氏厲聲而入大女躲避二女在室熊氏卽將二女強拉而出拉破衣服露體仆地何大騾子等在旁觀笑王文秀之母郭氏情急尋獲大女交付熊氏始將二女釋放時陳子臣亦至隨同搶大女回家與陳小雨婚配詎二女被辱抱忿旋卽自刎殞命研訊各犯不諱將陳子臣等擬以絞流徒杖等因具題 應如所題陳子臣應比照強搶良家妻女爲妻妾者絞監候配與子孫者罪亦如之律擬絞監候秋後處決何大忠應

照媒人知情減等律僉妻杖一百流三千里至配所責四十板何大
 驟子等均照白晝搶奪杖一百徒三年為從減一等徒二年半至配
 所責三十五板熊氏罪坐其夫陳小兩審無知情均無庸議再疏稱
 王二女以十五歲之幼女即知正節自持被拉笑辱甘蹈白刃應請
 旌表應如所請行令該地方官給銀三十兩聽其自行建坊外其節孝祠
 丙設位之處照定例遵行

見賊與客奪貨不放持挑戳死比劫問徒

雍正九年六月刑部會議覆南靖縣民吳萬等戳死林允林琴一案
 先據福撫劉 疏稱緣林允林琴於雍正四年十月十九日同至飛
 鳳林伺搶適遇吳安負棉花經過林允林琴向前截搶吳安喊救當
 有吳生吳萬聞喊救護吳萬見林允與吳安對奪棉花遂用尖挑戳
 傷林允心坎倒地林琴奪住吳萬尖挑吳生亦以尖挑戳中林琴肚
 腹倒地林允林琴立即殞命當夜吳安同吳生往吳萬家商謀將二
 屍移滅吳萬未曾同行旋即逃逸後據吳萬投首到案將吳萬照不
 拒捕而殺律擬絞監候等因具題臣部等衙門以律內罪人逃走不
 拒捕而追捕之人惡其逃走擅殺者以鬪殺論等語林允林琴搶奪
 吳安棉花當有吳萬吳生救護林允不即奔逸敢與吳安對奪棉花
 及吳萬戳傷林允而林琴又將吳萬尖挑奪住不放則林允林琴顯

與吳萬等拒奪相持非逃走不拒捕者可比行令該撫再加詳審妥擬去後今據福撫趙 疏稱當日林允行搶被吳安扭住因欲掙脫兩相拉扯林琴見林允被吳萬截倒意恐戕及己身因奪住其尖挑遂被吳生踵至亦用尖挑戳傷斃命是林允林琴原非拒捕但吳萬等見吳安與賊相持奮力赴救亦勢不容緩律以擅殺之罪原覺太過將吳萬改照夜無故入人家已就拘執而擅殺律擬徒等因具題應如該撫所題吳萬應比照已就拘執而擅殺律徒三年至配所杖一百折責四十板俟徒限滿日交與原籍地方官嚴行管束病故之吳安無庸議在逃之吳生嚴緝獲日另結再該撫疏稱此案實情已經遵例詳審改正從前承審各官應選免議等語應免其查議奉

旨依議

搶奪奸宿

康熙五十八年 月刑部會看得譚元等搶奸徐二姐一案先據蘄撫具 審擬絞流杖贖具題臣部以定例內凡聚眾搶奪路行婦女或賣或自為奴婢者為首者立斬為從者絞監候等語譚元杜文執持鋤柄夤夜搶奪徐二姐奸宿又送至徐復雲家藏隱明係惡棍糾夥搶去強奸將譚元依強奪良家女奸占為妻律擬絞情罪不符一次題駁該撫再加詳審定擬去後今據該撫疏稱譚元止與杜文商謀假以娶親為名哄誘李芳錫等相幫則非聚眾搶奪而到家強搶則與搶奪路行婦人不同且譚元本欲搶奪二姐為妻並非畧賣逼抑為婢將譚元仍照原擬且題譚元合依強奪妻女奸占為妻律擬絞監候杜文合依為從杖一百流三千里但事犯在

恩赦以前譚元免死裁等僉妻流三千里至配所杖一百折責四十板杖

刑部議
卷十一
文應免罪該撫既稱徐復雲依知人謀害他人不行舊告律杖一百
律折責四十板已經發落應無庸議奉

旨依議

搶奪工人妻抵償工價

雍正二年六月刑部會議覆趙大等扛槍諸氏一案據署江撫何
疏稱緣趙大偕妻諸氏賣身于徐子超家爲僕後趙大併妻潛逃被
徐子超獲回令其出外措銀贖妻趙大遂投于張天行家傭工二載
索銀贖妻張天行無銀給付輒起意槍還諸氏以抵工價糾同張三
等于康熙五十九年十二月二十日三更時群赴徐子超家張天行
打落大門與眾直入諸氏房中徐子超叫喊張天行等各持扁挑樹
棍打傷徐子超頭顱將諸氏扛擡回家給付趙大而散徐子超傷經
平復歷審各認不諱將趙大等擬以流罪援

赦且題除爲首之張天行爲從之張催丁賢強才俱取供後在監病故不
議外趙大周三俱合依搶奪傷人爲從律杖一百流三千里但趙大
等事犯在

赦前均應免罪脫逃之任如等亦應免緝再該撫疏稱監斃張天行之管
獄承審各官除青浦縣捐陞知縣甘國雄署青浦縣事婁縣縣丞梅
收廷俱承審病斃二名例得免議外應將監斃張天行等四名之青
浦縣典史韓復昌照例罰俸一年事在

赦前相應免議奉

旨依議

搶奪乳哺之女為媳致死鄰人之母不作鬪毆定擬

雍正三年十一月刑部議覆安撫李 疏稱賈德州民盛之坡生女
春妹因伊妻病乏乳托張承恩之婦乳養每年給以飯資春妹六歲
時承恩捏稱係伊養媳賣與沈培初家為媳之坡知覺將銀贖回十
有餘年雍正二年十二月初九日盛之坡將春妹嫁與濮陽演為妻
張承恩藉前寄養之名指為伊家養媳謀欲奪回與伊子張連朋完
配糾約張之相張之完張之賢張振廷梅老牙并帶伊子張連朋于
十二月十四日至濮陽演家內承恩即將桌椅等物打碎春妹驚慌
避入鄰人鄭洪福家承恩父子追入伊室洪福之母丁氏攔阻承恩
推傷丁氏胸膛丁氏叫罵承恩又用脚踢丁氏腰眼跌地隨將春妹
搶至張之相家安頓盛之坡聞女遭搶恐被姦污邀同伊弟盛之祿
等往張之相家將春妹帶歸丁氏受傷越十九日殞命歷審不諱將

張承恩照鬪毆律擬絞張之相等照不應重律擬杖等因具題查張承恩將盛之坡寄乳之女春妹任意偷賣經盛之坡贖回十有餘年嫁與濮陽演為妻張承恩等後又赴濮陽演家強奪春妹又將勸阻之丁氏脚踢斃命肆行搶奪致斃人命並無兩相鬪毆情節與鬪毆殺人之律不符應將張承恩改照白晝搶奪傷人律擬斬監候張之相等雖未助毆但附和強搶張之相等均應改照白晝搶奪為從減二等律各徒二年半至配所責三十五板又稱隨父同往搶春妹之張連朋應照家人共犯罪止坐尊長律免議所毀桌椅等物于張承恩名下追賠等語均毋庸議春妹仍給濮陽演完聚奉

旨依議

搶奪婦女情事未確

乾隆八年閏四月刑部會議覆魏榮強搶李漢友之女為妻一案據調任湖撫范 疏稱魏榮之父魏世英與李漢友住居相近魏榮時常往來情熟遂與二姐調戲成姦迨後情密魏榮因聞二姐有人作伐向二姐悼歎二姐以事由伊父無可如何詎魏榮眷戀情深遂萌搶奪之念乘伊父外出糾約族人魏國柱魏正達魏大宗同至酒店共飲商謀搶奪邀魏進占進店魏榮并挽其相幫各犯允從魏榮復逼令胞弟魏正華與魏三一同前往拆開竹門將二姐扯出負至中途引領歸家卽于是夜成婚李漢友報縣拘審魏進占唆令世英以嫌貧賴婚等情具訴該縣吳崑不問虛寔卽將二姐斷給魏榮完聚并將李漢友責懲銷案業經訪出吳崑劣蹟多端將此案一併列款題參今訊據該犯等供認不諱將魏榮擬絞李二姐處以枷責魏世

英等擬杖等因具題查承審案件必須供證明確方可按律定擬此案據李漢友供稱魏榮倩人來向小的討要與他結親小的見魏榮年紀大女兒年紀小不允那曉得魏榮統領多人把女兒馱去等語李漢友果有求親不允情事則世英所控賴婚自屬妄捏世英所托者何媒所求者何語于何年月日求親不允漢友不能明白確供承審官並不再加究詰係屬何故至魏榮與李二姐年紀本不相遠漢友于乾隆六年呈稱有女二姐年十八歲二姐于七年到案又稱年二十歲事隔一年何以忽長二歲是漢友供吐不實已屬顯然至二姐初供從前並沒有姦情那夜是一人馱去並沒有人扛擡等語及以櫻刑嚇問又供父親與魏榮家相隔不遠我因與他有姦就儘他馱去成親之後魏榮說他父親最嚴捨親之事原是瞞着的及至他父親回來是小女子同魏榮跪求纔饒了等語直魏榮家有嚴父

且與漢友家相去不遠若無從前許婚緣由何敢將二姐強搶至家二姐又何故肯跪求伊父且族人魏正達等幫搶者多至五人既非受賄又非畏勢又無希冀輪姦劫財等情若非原有許婚情由則五人何肯聽從魏榮糾合更可異者魏榮強搶二姐執棍打入拆開屋壁漢友一家夫婦子媳目擊情形恬然安坐既不呼救鄰里又不上前打奪任聽二姐竟上魏榮之背公然馱去是何情理若云幫搶人多不敢拒阻則案內又稱止有魏正華一人點燈同入餘人俱在門外而幫同強搶之魏正華等五人又稱俱已脫逃並無一人到案諸供恐非信讞且漢友之媳當三更時分突被一人扯住却從容問云你扯我做什麼我二姑在婆婆房裡若非合家共知是夜魏榮來搶二姐豈有如此言語情狀恐衆令吳崑前審未甚荒唐如果今次所審不虛則吳崑將黃夜劫閨重案顛倒是非轉責漢友二十板將二

姐給與刖閨之魏榮領去自必另有受賄受囑別情不然雖狂惑喪心不至於此此處又豈得不細加訊詰承審各官混行草率結案將二姐依軍民相姦例枷責又將魏榮依豪勢之人強奪良家妻女律擬絞種種舛錯不可枚舉應令該撫另委賢員再加詳審妥擬具題到日再議可也奉

旨部駁甚是依議

強賣期親尊屬與人爲妻妾加重擬斬

乾隆六年六月刑部會議覆涇縣民董宮等強賣伯母湯氏姑媳并搶分家財一案據安撫陳 疏稱董宮係湯氏親姪湯氏之夫董恒與子董招俱經物故湯氏與媳陳氏撫孤守志董官謀佔家資起意奪節因知章大毛欲娶妻室卽誘以湯氏頗有資囊不要財禮婚書只要強搶章大毛貪而允從約定湯氏赴夫墳掛帛往搶董九令代爲催轎同董宮董香董添董昂董朋章大毛章九齊赴魯村崗守候屆期湯氏至彼見勢欲強搶卽剪髮投塘適遇路過人衆救阻湯氏得脫奔回母家詎董宮乘湯氏未歸復起意強賣陳氏竟有娶主湯華議定財禮銀十兩六錢交銀之後告知陳氏不願嫁必須強搶情由湯華亦允從央求堂叔湯德湯効并董宮董法董小桃等俱在涼亭會齊同赴陳氏家拽門入室陳氏已經就寢聞聲披衣起坐董宮

與董法將陳氏以被網縛背出交付湯効駝去董宮董法董小桃遂
同董九令董昂董香董朋董可董榜董耆董小花董宮花董添董伏
等將陳氏家物分搶一空陳氏被搶至湯華家抵死不肯成親經婦
女伴宿看守湯氏聞信歸視鳴同族長鄉約董國掄等赴控董宮聞
信復糾原搶湯氏之董九令董添董昂董香董朋章大毛章九齊等
在章家渡候搶湯氏以絕訟累經董國掄等喝阻當經前涇令景四
維差提追出陳氏給領拏究各犯旋有知情同謀搶賣湯氏之董汝
翼恐被牽累嚇挾董珏董四向氏勸息董宮白認賠估銀三十七兩
給氏收受而董汝翼之子董效乘勢又將湯氏所收銀兩搶去一十
二兩三錢以至湯氏復控乃謀娶陳氏之湯華矣與全婚亦具詞控
府屢審不諱除董汝翼自縊身死不議外將董宮等擬以絞流徒杖
等因具題除董汝翼自縊不議外應如該撫所題為首強嫁之董宮

應照強奪良家妻女賣與他人為妻妾者照強奪良家妻女姦佔為
妻妾絞罪奏請例擬絞監候奏請

定奪強娶湯氏陳氏之章大毛湯華均合依尚未成姦照已被姦估減一
等例各杖一百僉妻流三千里該撫既稱董九令董昂董香董朋董法董
小桃均合依為從減一等律杖一百徒三年董朋董可董榜董耆董
小花董宮花董效均應照搶奪議擬查律載親屬搶奪比依惡嚇糾
斷董朋董可均合依恐嚇取財准竊盜贓五十兩加一等為從減一
等律各杖六十徒一年董效准竊盜贓一十兩杖七十加一箠杖八
十董榜董耆董小花董宮花合依准竊盜贓五十兩加一等無服之
親減一等為從又減一等律各杖一百章九齊湯効湯德應照同行
知有謀害不即阻當首告律各杖一百董珏向湯氏勸和應照不應
輕律笞四十杖笞各犯先行折責發落等語均應如該撫所題完結

再該撫疏稱查強賣之例雖未致死即擬絞罪而例內又云婦人夫
 亡守志若有用強求娶逼受聘財因而致死者發邊衛充軍則強娶
 節婦已致死者止擬軍罪輕重互異但良家妻女與節婦本無區別
 一有用強娶賣俱為風化所關而親屬與凡人并已未姦污已未致
 死及圖財與不圖財例內未有分別仰請

皇上勅議逐條指明定例庶擬罪不致出人等語查例載強奪良人妻女
 賣與他人為妻妾者擬絞奏請

定奪蓋用強搶奪則兇橫之情形已露賣為妻妾則本婦之名節已虧故
 不必問其致死與未致死均擬絞罪也至例載婦人夫亡守志若
 用強求娶逼受聘財因而致死者發邊衛充軍等語蓋逼受聘財並
 非搶奪可比用強求娶亦與賣為妻妾者有殊故雖已致死亦止發
 邊衛充軍也以上兩條原情定罪並無輕重互異之處毋庸另為置

議又該撫疏稱親屬與凡人并已未姦污已未致死及圖財與不圖
 財例內未有分別等語查強娶之案均屬凡人除強奪良人妻女姦
 佔為妻妾者已有擬絞正條其中途奪回未及姦污者亦有擬流正
 例外若已被姦污而本婦自盡者應照強姦已成本婦羞忿自盡例
 擬斬監候未被姦污而本婦自盡者應照強姦未成本婦羞忿自盡
 例擬絞監候是已未姦污已未致死之處亦經分晰毋庸另議科條
 惟查強賣之案或貪聘金或利家產均由圖財而起而其中有親屬
 亦有凡人未可一例科斷查例內有強奪賣為妻妾者擬絞奏請一
 條又有聚眾夥謀搶奪路行婦女或賣或自為奴婢者為首斬決為
 從絞監候一條不惟斬絞罪名輕重懸殊亦且親屬凡人未經註明
 援引比照易有出入誠有如該撫所云者請嗣後有凡人聚眾夥謀
 搶奪路行婦女或賣或自為奴婢者仍照為首斬決為從絞監候之

例其有聚夥未眾搶奪非路行婦女但強賣與人為妻妾者并疎遠親屬圖財強賣者均照擬絞奏請之例至親屬內有期功卑幼謀佔貲財貪圖聘禮將伯叔母姑等尊屬用強搶賣逆倫背理尤為可惡請照強奪良家妻女賣與人為妻妾之例量為加重擬斬監候倘蒙俞允即將此案強賣嫡親伯母之董宮照此例擬斬監候并請移咨律例館載入例冊仍通行直隸各省督撫一體遵行奉

旨九卿議奏臣等查該撫疏稱強奪良人妻女賣與他人為妻妾者雖未致死即擬絞罪而例內又云婦人夫亡守志逼受聘財因而致死者發邊衛充軍雖已致死止擬軍罪輕重互異等語詳繹例意一因強奪良人妻女又復圖財轉賣傷風敗俗因知法紀故毋論致死與未致死均應擬絞一因求婚未遂逼受聘財既與強賣不同并非搶奪可比故雖經致死亦止擬軍從前定例原屬平允毋庸另為置議至

該撫疏稱用強娶賣風化所關而親屬與凡人并已未姦污已未致死圖財與不圖財例內未有分別等語查強娶之案均屬凡人如強奪良家妻女姦佔為妻妾者絞監候此即已姦污未致死之正律也中途奪回及尚未姦污者減一等流三千里此即未姦污未致死之定例也至強姦既成本婦羞忿自盡者斬監候強姦未成本婦羞忿自盡者絞候此又已姦污而致死與未姦污而致死之條例也此等案件或因貪色或係圖財厥罪維均從前條例已極周詳是強娶一項亦毋庸添設條款至強賣一項均由圖財而起查例內有強奪賣為妻妾者擬絞一條又有聚眾夥謀搶奪路行婦女或賣或自為奴婢者為首斬決為從絞候一條並未將已未姦污已未致死等項逐條分晰者蓋強娶者有已未姦污已未致死之分而強賣之案既因圖財而壞人名節即應一體科罪毋庸另為分晰但此等案件有凡

人亦有尊卑親屬若一例科斷情罪未協且既有擬絞奉請之例又有為首斬決為從絞候之例若混行牽引必致輕重失平經刑部等衙門分晰註明并將親屬凡人量為區別揆之情罪實屬允協應如刑部等衙門原議請嗣後有凡人聚眾夥謀將路行婦女肆行搶賣者仍照為首斬決為從絞候之例其有並非糾夥聚眾搶奪路行婦女但強賣與人為妻妾者并親屬內圖財強賣者均照擬絞奉請之例至期功卑幼謀佔家貲或貪圖聘金將伯叔母姑等尊屬用強搶賣者若照凡人及疎遠親屬一體科罪殊屬未協請照強奪良家妻女賣與人為妻妾之例量為加重擬斬監候倘蒙

命允此案強賣嫡親伯母之董宮即照此例擬斬監候秋後處決餘仍照刑部等衙門原議奉

旨依議董宮依擬應斬着監候秋後處決

盜搶室女鎗斃三人照光棍例定擬

雍正二年又四月吏部議覆刑部咨稱會同縣民譚子壽等鎗死沈宗亮等三命一案據偏撫魏 將譚子壽等擬以斬絞枷責援

赦具題查譚子壽係沈富明傭工之人先與其女章英通姦繼因謀娶不遂將章英強搶歸家又棍傷富明其情理可惡及富明倩族隣沈宗亮等往譚處理論子壽兄弟三人齊放鳥鎗各傷一人登時殞命兇惡已極譚子壽改照光棍為首例擬斬立決譚廷佐譚古壽初同槍章英繼又放鎗各斃一人明係有意行兇豈非為從可比譚廷佐譚占壽改照故殺律擬斬監候秋後處決三命三抵情法始當等因具題奉

旨譚子壽姦搶沈富明之女又鎗斃三命情罪可惡着即處斬譚廷佐譚占壽俱依擬應斬着監候秋後處決餘依議魏廷珍諸事柔懦章率朦

混不合交與該部察議具奏原審此事各官着該撫查參欽遵移咨到部查定例官員含糊具題者降一級留任等語應將魏 照例降一級留任奉

旨魏廷珍着降一級留任餘依議

強奪已妻誤捉人妻用強姦詐

雍正十一年四月刑部議覆蘇撫喬 疏稱上海縣民陳相繼母朱氏有前夫之女受姐自幼賣與陳顯仁為婢及朱氏再醮陳相之父遂將受姐許配陳相陳相因無力回贖輒起意搶親乘伊父母傭工在外遂與顧永商定轉約村隣楊吉張正凌全王允凌九陳來張與倪良張炳文張本顧品于雍正八年十一月二十七日夜在楊吉家會齊分執器械齊赴陳顯仁門首留張正等十人在外等候陳相顧永楊吉打門入室陳顯仁受姐俱先驚覺躲避顯仁之妾康氏正下床欲避陳相疑為受姐卽抱出門與顧永楊吉擁回家內張正等先各散歸惟顧永楊吉在陳相家前呈吃酒嗣陳相詢知康氏係陳顯仁之妾遂欲強姦抓傷康氏乳腹康氏堅拒不遂陳相又令顧永楊吉入房幫拳康氏頭足并掩其口致陳相成姦而散康氏被污哭喊

驚知鄰人奚子瑞等往喚朱氏回家將康氏送還歷審不諱查糾黨持械乘夜搶人婦女擎按強姦淫惡情狀殊類光棍除倪良等于取供後解審中途病故不議外陳相應擬斬決先行刺字顧永帮擎康氏擬絞監候候部覆至日刺字張正凌全王兌凌九陳來張興止同陳相搶人不知強姦情事各杖九十徒二年半刺字等因具題陳相合依光棍為首例擬斬立決顧永合依光棍為從例擬絞監候刺字凌全王兌凌九張興俱合依搶奪為從律各徒二年半至配所責三十五板俱刺字受姐仍聽伊主陳顯仁自行擇配楊吉張炳文張本顧品獲日另結奉

旨依議

搶人聘定之妻到家成婚

雍正七年十一月刑部議覆蘇撫彭 疏稱閩張氏原係蔡魯幣嫡伯家人閩一亮之妻一亮物故閩張氏攜女再醮張耀後閩張氏將女招贅劉之英胞弟劉之賢為婿尚未成婚張耀劉之賢相繼病故閩張氏同女遂依住劉之英家雍正五年三月初五日閩張氏主婚劉之英收受財禮將閩氏許與蔡魯幣嫡伯家人陳宜山為妻擇日迎娶適盛可功至董其章家見閩氏少女欲娶為妻轉浼鮑如洞向劉之英求親不允詎盛可功起意強搶訴知伊叔盛以品以品不行阻遏可功遂約鮑如洞鮑如生董其章李振綱劉小招張黑子小四子劉五劉起鸞于初七日齊至之英家將閩氏搶回并拉之英到家又令王考偽立婚書逼令之英畫押之英不允逃回盛可功竟行成婚陳宜山具縣控究閩氏祖護可功與伊母後夫之子張以山誣告

蔡魯幣謀買為妾等情審擬具題盛可功合依強奪良家妻女律擬絞監候盛以品不行阻遏但並未主使亦未同行不應如該撫所擬依詐教誘人犯法至死減等律杖流應將盛以品與隨行搶親之董其章鮑如生張黑子劉五代寫婚書之王考俱照不應重律杖八十鮑如洞為盛可功說媒已知閻氏受人聘定乃復與盛可功同行搶親明係協謀強奪不應如該撫所擬杖責應將鮑如洞比照白晝搶奪律徒三年至配所折責四十板又稱閻氏合依誣告期親尊長加所誣罪三等律應杖八十徒二年係婦人決杖一百餘罪收贖仍斷歸陳宜山完聚但陳宜山不願與閻氏為婚應聽伊母擇配陳宜山所用財禮向盛可功家屬名下追還等語應毋庸議李振綱等獲日另結監繫徒犯張以山之典史李芝豫照例罰俸六個月奉

旨依議

強奪經官斷歸之婦到家姦污

雍正六年五月刑部議覆安撫魏 疏補汪氏之夫宋有千病故遺妻汪氏汪氏夫族宋吉文宋象伯宋其卜於雍正元年四月內同媒于萬侯親立婚書得受財禮將汪氏許嫁朱習權為妻汪氏不從未吉文遂同朱習權等至汪氏家欲行強搶汪氏躲避宋吉文乃搶汪氏物件汪氏控縣將朱習權宋象伯宋其卜枷責并斷銀六兩以償還汪氏失物追繳婚書結案乃朱習權以財禮未還復于雍正四年四月初五日糾同萬虎于萬侯柯灶汪千催坐彭鳳徐根美于有權船隻至汪氏家強搶汪氏載至朱習權家萬虎于萬侯幫同捆縛汪氏之手朱習權強行姦污汪氏疑隣家錢學禮通信朱家來搶乃至錢學禮家炒鬧打毀什物審擬具題除為首強搶汪氏姦污應擬絞之朱習權於取供後在監病故并同行之柯灶汪千未經到案病故

均不議外萬虎于萬戾俱照強搶良家妻女又姦佔為妻妾為從減
一等律各僉妻流三千里至配所責四十板該撫既稱上岸同搶之
船戶彭鳳徐根美于有權均照不應重律杖八十先行發落強搶之
宋象伯宋其卜從前已經枷責今次強搶審不知情應免重科汪氏
所告錢學禮等知情通信嚴訊並無其事汪氏毀壞錢家什物念係
女流被搶忿激姑免坐罪仍於汪氏名下追銀一兩賠償宋象伯等
所得財禮銀十九兩二錢照道入官在逃之宋吉文獲日另結奉

旨依議

強奪孀婦尚未成婚

乾隆六年四月刑部會議覆吳川縣民曹國龍強搶楊名芳孀媳莫
氏與李亞三為婚未成一案先據原署廣樞王 疏稱緣李亞三妻
故寄食于表兄曹國龍家幫其耕墾曹國龍知楊名芳孀媳莫氏頗
有姿色欲娶與李亞三為繼室先逸唐瓊秀做媒唐瓊秀以莫氏堅
心守節不便往說曹國龍設計強搶許還唐瓊秀原當錢五千文田
契令其認作媒人并令硬証楊名芳收過李亞三聘錢八千文唐瓊
秀應允乾隆四年三月初五日夜曹國龍乘莫氏之翁楊名芳往茂
名縣地方祭墳未回夜率李亞三唐瓊秀併伊族弟曹國鳳及唐瓊
秀之妻陳氏共五人分執火把板榔齊至楊名芳門外先令陳氏背
幼子往喚楊名芳開門假稱看病楊名芳之妻龐氏開門陳氏入屋
卽給板榔與龐氏又喚莫氏同吃莫氏在房閉門不出曹國龍等擁

進捏稱揚名芳受過李亞三聘禮今要莫氏成婚莫氏情急踰牆逃至隣居黎晉家躲避曹國龍李亞三唐瓊秀奔至吵鬧黎晉勢不能阻將莫氏送回曹國龍李亞三用帶縛住莫氏兩手強搶回家李亞三欲與成婚莫氏堅拒不從李亞三又欲將莫氏網逼被莫氏口咬其手李亞三氣忿掌批莫氏之臉未經成婚是夜龐氏奔投地保鄉老余乾鼎等于黎明齊到曹國龍家共斥其非李亞三始將莫氏放回莫氏控縣拘獲各犯屢審不諱查律載豪強勢力之人強奪良家妻女姦佔為妻妾者絞配與子孫弟侄家人者罪亦如之等語今李亞三係曹國龍表弟與弟侄家人無異將曹國龍依律絞配監候李亞三隨同曹國龍將莫氏縛搶至家又欲網逼成婚與強佔律內所配男女不坐者不同應照名例共犯罪分首從隨從者減一等律擬流唐瓊秀依媒人知情律擬流曹國鳳樹杖等因具題經臣部等衙

門議覆查律載豪強勢力之人強奪良家妻女姦佔為妻妾者絞配與子孫弟侄家人者罪亦如之等語蓋必強奪而又姦佔者方擬絞罪今曹國龍起意強搶莫氏回家與表弟李亞三為妻李亞三強逼莫氏成婚莫氏不從李亞三欲網綁莫氏莫氏咬傷李亞三之手李亞三掌批其臉莫氏堅貞抵拒不為所污適地保余乾鼎等趕至將莫氏放回是曹國龍雖起意搶奪但李亞三尚未成婚與強搶而又姦佔者有間將曹國龍擬以縲首與律未協應令該署撫妥擬具題到日再議等因題駁去後今據該署撫王 疏稱曹國龍與李亞三等強搶莫氏到家尚未姦污前擬縲首與律未協查乾隆五年閏六月內奉准刑部咨議覆定例嗣後強奪良家妻女中途奪回及尚未姦污者照已被姦佔絞監候律減一等杖一百流三千里等語今曹國龍等強搶良家妻女尚未姦污寔與此例相符曹國龍應改

照已被姦佔絞監候律減一等例擬流李亞三照爲從減一等律擬徒唐瓊秀合媒人知情減犯人罪一等律擬徒曹國鳳仍照原議擬杖等因具題應如該署撫所題曹國龍合依強奪良家妻女尚未姦汚者照已被姦佔絞監候律減一等例僉妻流三千里至配所杖一百折責四十板李亞三合依爲從減一等律杖一百徒三年唐瓊秀合依媒人知情減犯人罪一等律杖一百徒三年至配所各折責四十板俟徒限滿日遞回原籍交與該地方官嚴行管束不許出境再該署撫原疏內稱曹國鳳雖屬同行但未助力且係曹國龍誘脅隨行合依不應重律杖八十照例先行折責發落唐瓊秀所得曹國龍賄還原當田契載錢五千文應追入官其田聽從唐瓊秀管業陳氏罪坐伊夫應毋庸議等語均應如該署撫所議完結再該署撫疏稱本案從前承審錯擬職名係現任吳川縣知縣陳至陛前署高州府

大官田同知王游前帶理廣東按察司陞任布政使王 署理廣東巡撫臣王 但本案係經知縣陳至陛與臣自行改正前署高州府大官田同知王游前帶理按察司事陞任布政使王 均係離署在先無從改擬今已改正應請一并邀免等語查定例督撫具題事件內有請罪不協律例不符之處部駁改正具題將從前承審舛錯之處免其議處等語應將從前承審遵駁改正之吳川縣知縣陳至陛原署廣東巡撫王 均照例免議前署高州府大官田同知王游前署按察司今署福建巡撫布政使王 已經離署無從改擬相應免其查議奉

旨依議

搶財辱婦照光棍例

康熙三十九年八月刑部會議覆李德陽等抄搶方自亮家財併逼單氏縊死一案據直撫李光地審擬斬絞具題查李德陽垂涎方自亮家道殷實假托主命使伊子李連登等將自亮當舖四座及銀錢糧食牲畜抄搶罄盡知自亮家口避居方歉家內于康熙三十七年七月初五日三更時候率領伊子李連登李連生李增兒李公輔王仁我等各持鐵尺腰刀等械打入方歉家抄搶銀錢等物并將亮妻單氏及方歉夫婦家口等從被內拿出赤身綁縛用鐵尺腰刀毆打又將隣居方奇妻王氏并子俱綁縛遊街拉至伊家逼令單氏等裸體行酒因氏不從連登連生復用鐵尺腰刀打傷單氏肩甲等處直至本月初十日鄉民哀懇保回以致單氏毒憤自縊於李德陽家墳內李連登又強羈劉氏圖姦未放歷審情真李德陽合照惡棍設法

嚇詐財物糾聚用繩繫頸蜂擁拿去處害此等真正光棍事發不分得財與不得財為首者立斬例應斬立決李連登李連生照為從例應擬絞監候秋後處決已起之贓給主未起之贓照例追還李增兒等毆緝獲日另結伴作李應坤等將單氏縊死之處不會驗出該州已經責懲發落毋庸議奉

旨李德陽著卽處斬李連登李連生俱依擬應絞著監候秋後處決餘依議

昏夜入室奪物依搶奪科斷

康熙三十年三月刑部議覆蘇撫鄭 䟽稱王四等俱係革職知縣 証實竟案內欵証因解省候審糊口無資康熙二十八年五月三十 日求乞于城外孫家四地方天晚風雨遂于張三宋弘門首躲避更 深時分王四同彭四張大鑼先入張三家復至宋弘家奪取兩家衣 物尚未依分次早被捕役盤獲歷審情真但各犯昏夜入室同事主 爭奪蚊帳與竊盜有間將王四等照搶奪律擬以徒杖具題王四合 依搶奪人財物者杖一百徒三年刺字律應刺字徒三年至配所折 責四十板彭四張大鑼合依為從減一等律刺字徒二年半至配所 各折三十五板已獲贓物給主未獲贓物將盜產變賠押解王四等 之解役朱良貴雖不知情但不加防範合依不應重律杖八十折責 三十板奉

旨依議

搶姦幼女并欲覓主售賣

雍正七年 月刑部議覆河督田 疏稱魯山縣馬四海原籍山西
于雍正五年八月二十五日卯時担負竹篾路過汝州窺見宋蚩女
在地摘取野菜馬四海隨起意拐賣拉其同走宋蚩女叫喊馬四海
嚇打不令聲張並置篾內擔走至魯山縣瓦屋街西場內馬四海輒
將宋蚩女強姦復將宋蚩女假作伊女拐在太山廟道士王凌觀房
內暫住一宿復至下湯庄范增店內住宿至九月初五日晚乘范增
出外又將宋蚩女強姦欲覓主售賣隨該縣捕役盤獲歷審不諱
查馬四海將十一歲之幼女乘其在地摘菜輒強搶置篾內意圖拐
賣復又嚇逼強姦淫惡已極將馬四海等擬以斬決杖責具題馬四
海合依搶奪路行婦女為首例擬斬立決王凌觀審不知情但不盤
詰容留住宿合依不應重律杖八十已經發落毋庸議宋蚩女交伊

父宋文美領回其脫逃之范增嚴緝獲日另結奉
旨依議

拾路遺財物事主追討不給照搶奪


康熙四十七年六月刑部覆直撫趙 題劉奇奉捏報旅人張進孝
等截劫一案緣劉奇奉帶銀盛貯搭包于康熙四十五年六月十三
日行至武邑縣二十里舖遙見四騎疑為匪人輒將銀搭包藏于谷
地身離數十步假作出恭蹲守進孝窺見搭包遂入谷地拾取搭包
而去奇奉當即追討進孝以路拾不還王可有聞聲回顧無人向進
孝索討物件至晚詰詢情由進孝告知可有借用銀十兩餘銀進孝
獨得奇奉捏為截劫報官嗣進孝聞知遂同可有自首但進孝拾銀
奇奉追討不給有類搶奪張進孝應照白晝搶奪人財物律杖徒既
將所拾銀兩自行投首應照犯罪知人欲告而自首者減罪二等律
杖八十徒二年係旅人枷號三個月鞭八十劉奇奉合依以竊報強
鞭一百律係民人折責四十板王可有借用銀兩自首免議奉

百知道了

糾眾劫殺處分

康熙四十四年三月吏部議江撫李 疏永新縣頑民糾眾搶奪賀
騙等稻穀鄉勇追逐相持格鬪殺死顏克凡等身屍滅跡事關行兇
搶奪將不行嚴飭之永新縣知縣等題叅查定例大盜二三十人帶
執器械將人砍傷劫去財物專汛官員不能防護照大夥盜賊例專
汛官革職兼轄官降二級戴罪圖功等語應將永新縣知縣典史革
職吉安府知府降二級留任同知領解京餉毋庸議奉

旨依議



Faint vertical text columns, likely bleed-through from the reverse side of the page. The characters are mostly illegible due to fading.

